

1 KOLINIT

Kweiboug Pawl itāvin ven Kolinit waseg, igeiguy; gamag mwasanin mo isimounids waseg Yeisuw, iyakelesiys. Ven towen ises katanok bweilim, kwayuwein bweilim watapwan mo inoun, in Siliy. Itāvin ven mwasanin ikous, iyum in wanven.

Gamag tasiyas niyakelesiys ven Kolinit waseg mwasanin ivag asisinap kalbaleb. Pawl iligen bulagan, mapuna ilel let towen, iwyebe, inekes min-Kolinit mo ivinis. Let towen wanuwan livānen asisinap kalbaleb, son Pawl anilivan bwanabwein. Asisinap kalbaleb peinan ilivis, ivages bod babaw, o peinan teitan gamag ininagow, o peinan iyātals wamatan takaleiwag teitan nag isimounid waseg Yeisuw, o peinan gamag mwasinis imgwavis kan mo isekes tasiyas tayakelesiys beikams, o peinan nag ivnāses tasiyas takaweins livānen Yeisuw, o peinan daGuyaws inakamkwam waseg mwasanin gamag tagoveks tamwamoums, mwasanin gog isesus-wan asimoun.

Pawl anilivan towen nilē peinan tasiyas asisinap kalbaleb, o peinan min-Kolinit mwasanin nag isimounids waseg livānen Yeisuw neikit kanig waseg; o nag ikakins Kululuwan Teiwen Bwanabwein anavagein tayakelesiys wasigeis; o nag ikakins sinap bwanabwein, yagan siwayoub, nag.

Nakabsilamaw

1 ¹⁻³Yey Pawl, gunawotet akokew livānen Yeisuw Kelis, peinan Yowbad nakaleiwag māwan. Soug bwadag Sosten nilabeig let towen waseg vāgan bukuvinis, Yowbad nayakelesiy yakamiy Kolinit waseg. Yeisuw Kelis waseg bo ikayuseimiy, mo nukumlavags angamag bwanabwein, simiyas ven babaw gimgilis, kalisiy nikavtagis yagan siGuyaw Yeisuw Kelis; mtowen daGuyaws babaw yakids. E, daGuyaws towen son Tamads bisiwyoubumiy mo beitaw nuwamiy.

⁴⁻⁷Tut babaw bo ikalin nuwag Yowbad, peinan isiwyoubumiy yakamiy, Yeisuw Kelis waseg. Youda babaw nisekeimiy, vāgan bukukwakins o bukulivans sinap moundid waseg. Yakamiy wasigeis bo ikamat livānen Yeisuw Kelis, māwan nalivan. Nag kweitan navagein Yowbad ikābwag wasigeis yakamiy, nag. Mikasis bwein-wan, tut towen nitakayamats daGuyaws Yeisuw Kelis igaw beiyum beim ven watinow.

⁸⁻⁹Yam babaw Yeisuw imtakavateids, o tut wanakougwaw māwan ee... igaw daGuyaws beiyum beim igawa tadidumwals yakids. Yowbad tonen

bo idaweids vāgan bitamsamwas sods daGuyaws Yeisuw Kelis, mtowen natun. E, ansinap Yowbad mound-wan.

Awoum kulivis bukumlavags bod babaw

¹⁰Sivinag baguyeimiy budag yakamiy vāgan kid beivag ninoumiy katanok-wan. Alivan daGuyaws Yeisuw yagan waseg, awoum kutawleyeimiy. Awoum beivag bod babaw. Awoum! Kadilokena ninoumiy bilātan simsimiyas wasigeis, amilivan bimlavag katanok-wan.

¹¹⁻¹⁵Kilow nagamag mwasanin bo ikamats waseg yey, idibakeigs livānen mikamniman yakamiy, peinan teitan yakamiy bilana, “Yey Pawl nagamag yey”; teitan yakamiy bilana, “Yey Apolos nagamag yey”; teitan yakamiy bilana, “Yey Pita nagamag yey”; teitan yakamiy bilana “Yey Kelis nagamag yey”; mamagin bo kulakes Kelis, vāgan kid bibaw. O budag yakamiy, tabta beiweigs yey Pawl waklos pinamiy? Adok nag. Tabta wayagag yey nibaptayseimiy yakamiy? Adok nag. Bo ibwein nanoug peinan nag abaptayseimiy yakamiy. Misinak abaptayses asteiy Kalisip son Gayus. Magat babaptayseimiy, adok bukulivans, “Bo ibaptaysem Pawl, wayagan tonen waseg.” Awoum bukulivans māwan.

¹⁶O mound, bo anuw, abaptayses Stepan sen nagamag. Adok misinak tasiyas.

¹⁷Peinan wawun gunawotet Kelis nisekeig nag babaptayseimiy, misinaka basekeimiy anilivan bwanabwein. Kukin bageiguy sinapun ven watinow, livānen Yeisuw neiweiys waklos nag bileb gamag, nag. Awoum bageiguy sinapun ven watinow.

Kelis neiweiys waklos

¹⁸⁻¹⁹Livānen Kelis neiweiys waklos; gamag tasiyas ikankanigs idokes livan makaw; yakids gog, peinan Yowbad ikatinabweids, takakinsa Yowbad natawtoun nises waseg livan towen. Yowbad anilivan nises Bukitab waseg mamagina:

“Tassinaps asisinap bo bagulek.

Babob asilivan tasiyas.”

²⁰Aveiyag bivages tasiyas tassinaps? Aveiyag bivages tasiyas tamtakavateins kaleiwag? Aveiyag bivag talliwon? Adok nag aveiyag bivages tasiyas. Bitakines Yowbad ansinap tawtoun, mo takakins sinapun ven watinow nag aveiyag bivag. Makaw-wan.

²¹Asisinap waseg, ven watinow gimgilis nag bikakins Yowbad, nag. Yowbad nanon bo bikatinabwes tasiyas nisimounids anilivan waseg. Ven watinow gimgilis idokes livan towen livan makaw. Yowbad nakaleiwag māwan. Bwein-wan ansinap towen.

²²⁻²⁴Peinan min-Yudiy sivines bikines naman mulin Yowbad, o minagilis inineivs asisinap; o yakids talivans livānen Kelis neiweiys waklos;

min-Yudiy gog ikasigumis livan townen, o ven babaw gimgilis idokes livan makaw; tage yākids kalisiy Yowbad nidaweids, tasimounids livan townen waseg, takinew min-Yudiy yakamey o takinew mina-Gilis yakamiy; yākidsa babaw takakins Yeisuw Kelis, peinan Yowbad natawtoun waseg Yeisuw, o Yowbad ansinap waseg Yeisuw.

²⁵Yowbad kadilok bitakayway gamag wasigeis, gagab-wan. Anilivan tonen, gamag idokes livan makaw, tage bo iton livan townen.

²⁶Sigwey, adok kukines tasiyas kalisiy Yowbad nidawes; tassinap ven watinow nag bibabaw nidawes; tatawtouns nag bibabaw, guyawaw nag bibabaw; nag.

²⁷⁻²⁸Tage bo idawes tasiyas asisinap nag, vāgan bitakayways wasigeis tasiyas tassinap; bo nidawes tougweys ven watinow vāgan bitakayways wasigeis tatawtouns, mo beivag asimwasin. Bo nidawes siyas toul vāgan guyawaw beivag asimwasin. Bo nidawes tasiyas butus nag ivakaein, vāgan bigidamis siyas butus avakein.

²⁹Nag kadilok gamag teitan bikaypom sinap wamatan Yowbad; nag.

³⁰Yowbad anmwānet, natawtoun waseg, ikaleiwag Yeisuw Kelis mo iyamoveids; ikatipel isekeids Yowbad ansinap; ikatinabweids; ikayuseids; ivageids tadidumwals yākids.

³¹Peinan Bukitab waseg livan nises, “Kal bilivan tawtoun waseg, kadiloka livānen daGuyaws bilivan.”

2 ¹⁻²Sigwey, kweiboug nawey Yowbad anilivan mound nasekeimiy, nag māwan mitovek yey, agulivan tawtoun waseg, o agusinap avakaein; adok nag. Peinan wananoug misinaka Yeisuw Kelis neiweiys waklos; adok bo basekeimiy livan townen; nag kweitan livan; nag.

³⁻⁴Bo asap wasigeis yakamiy, aguyeimiy livānen Kelis, gunagwey waseg, agupwāyat waseg, mamagina matapwad yey. Ta-balivan sinap tawtoun waseg; ta-bakaleiwag; nag. Deisa natawtoun Yowbad Kululuwan waseg bo alivan; mo nukuliganes, nukusimounids yakamiy.

⁵Sinapun Yowbad bo itawtoun wasigeis yakamiy; mapuna kusimounids sinapun Yowbad, sinapun gamag awoum!

Sinapun Yowbad

⁶⁻⁸Sinapun Yowbad kalivan sigwey tasiyas mamatuw asisinap, sinapun ven watinow awoum, guyawaw asisinap awoum; peinan nuwanaw beikous tasiyas. Talivānes sinapun Yowbad. Gamag babaw nag bikakins peinan bo ikawum wasigeis. Pwāmug-o nakaleiwag bo bisiwyoubuds yākids vāgan bitamwāsaws avakaein. Guyawaw ven watinow nag bikakins sinap townen, magat bikakins, adok libalab tanuwagan nag beiweiys waklos.

⁹Livānen mwāsaw townen nises Bukitab waseg, mamagina,

“Tasiyas isiwyoubus Yowbad, o ivnāses nakaleiwag;

nasiwayoub bo ikatineg vāgan bisekes.
 Tut gog towen gamag mites nag bikines,
 tiges nag biliganes,
 ninous nag bikakins,
 peinan nasiwayoub singay avakaein, bwanabwein.”

¹⁰ Kululuwan Yowbad bo ikatipel sinap towen isekeids; Kululuwan tonen ikakin Yowbad sinapun, aw-sinap gagab, aw-sinap moumouvit, kadilok bikatipel bisekeids.

¹¹ Misinaka kululuwan gamag ikakin nanon gamag, aveiyag nises wanuwan. Māwan Kululuwan Yowbad ikakin nanon Yowbad; nag tayuwein ikakin, nag.

¹²⁻¹³ Yowbad nanon nag māwan nanouds yakids. Kululuwan waseg ikatipel nanon isekeids, vāgan bitakakins youda babaw bisiwyoubuds. Sinap towen kalivan, nag māwan ven watinow gimgilis asisinap nillivans, nag. Sinapun Kululuwan Yowbad, kallivan gog amalivan. Kalisiy Kululuwan Yowbad nises wasigeis, mo biliganes livan towen, bikakins.

¹⁴⁻¹⁶ Gamag makaw nag bikakins sinapun Kululuwan Yowbad, idokes kid kabalāwein; tatagouwaws tasiyas. Siyas gog Kululuwan Yowbad nises wasigeis, kadilok tasiyas bikakins. O yakids māwan, youda babaw takakins, aveiyag bwein, aveiyag kalbaleb. Gamag makaw nag bikakin silawun sinapun Yowbad; nag kadilok bikaleiwag wasigeis yakids.

“Peinan gamag makaw nag bikakin daGuyaws nanon,
 nag kal bikatimlek Yowbad, nag.”

Yakids gog, nanon Kelis nises wasigeis yakids.

Yowbad nagamag siwotet kweitan kweitan

3 ¹⁻³ O sigwey, sivinag bakatimlakeimiy sinapun Yowbad; o nag gog, nag kadilok bukukwakins, nag. Adok Yowbad Kululuwan nag bises wasigeis yakamiy. Adok yakamiy māwana gamag makaw, māwan apwaw yakamiy; to nasekeimiy sus kusus, kan nag; peinan nag kadilokeimiy kan bukukwams. Igaw māwana ven watinow gimgilis yakamiy. Peinan kwamnimsimsimiyas, kuttavileiys; māwana ven watinow gimgilis yakamiy.

⁴ E, peinan teitan yak kulana, “Yey Pawl nagamag yey.” Teitan yak kulana, “Yey Apolos nagamag yey.” Māwana ven watinow gimgilis yakamiy.

⁵ Nag Apolos takaleiwag avakaein. Yey nag takaleiwag avakaein. Takaleiwag kid daGuyaws tonen. Natouwat yakamey. Mawotet bo isekem, teitan gamag kweitan nawotet, teitan gamag kweitan nawotet. Anilivan kakokew vāgan bukumounids waseg.

⁶ Mamagina youpeis bo asop yey, Apolos mo ikokew soup ivvmoum; Yowbad gog ivag kan igaw bisap.

⁷Nag tasapwein kan, nag tavmwamwein soup, misinaka Yowbad anmwānet tavagein kan.

⁸⁻⁹Yakamey mamagina tabgubag yakamey. Nag teitan bimug son waseg, nag. Igaw maysem bakakow, kadilok mawotet. Datoveks Yowbad, kawotet simey; mamagin inabag yakamiy; o mamagin nabunatum yakamiy.

¹⁰Yowbad isiwyoubug vāgan bakakin gunawotet mamagin tawtelein bunatum, kakol akelay bo ibunek; teitan gog isen sol, mo iwlulays wakunuwatan. Kadilok tawteleins bunatum biwlules bwein.

Kadiloka tawlulays bwein

¹¹Dakakols Yeisuw Kelis tatonen; nag kweitan kakol bwanabwein bitakelays; nag.

¹²⁻¹⁵Adok mwasanin bikawes biwlules akulouy, yed, akidous; mwasanin gog bikawes biwlules kilim, alviluw, awduvid.

Igaw yam towen Yeisuw Kelis bikaleiwag mayses tasiyas, biyakwanes sibunatum, amtowen bwanabwein, amtowen gaganen.

Tasiyas iwlules bwein, sibunatum bisesus tawtoun, maysan bwanabwein bikawes. Bunsiyas gaganen bigulekwes, bigob biyakous; tawteleins bunsiyas bunatum biyamkwanes siwotet, makava bikatimoves tatineis; mamagin tasiyas bilouvats kov avakaein; youd babaw bigob kov biyakous, makava gog bikatimoves gamag tasiyas.

¹⁶⁻¹⁷Adok nag kukwakins yakids mamagina Yowbad nabunatum yakids; Kululuwan Yowbad nises wasigeis yakids. Kukin teitan bigulek Yowbad nabunatum, igaw Yowbad biyageg gamag towen. Yowbad ikayus nabunatum vāgan bisesuna bwanabwein; nabunatum tonen yakids.

¹⁸Awoum kwatidavimiy tatineimiy. Kukin teitan idok tassinap ven watinow, kadilok bmlavag toubol, mo bikow Yowbad ansinap mound.

¹⁹⁻²⁰Peinan tassinap ven watinow mamagina toubol wamatan Yowbad. Livanen nises Bukitab waseg, mamagina,

“Tassinaps, Yowbad ivag; mo asisinap ikwanes tatineis.”

Kweitan livan nises,

“DaGuyaws ikakina tasiyas tassinaps
asisinap makaw-wan.”

²¹⁻²²Awoum kwamnamwans mituwaveks wasigeis. Peinan Kelis bo isekeimiy youda babaw.

Yey Pawl pinamiy yakamiy, o towen Apolos pinamiy yakamiy, o towen Pita pinamiy yakamiy, yakamey amababaw-wan pinamiy yakamiy.

Vena babaw nisesus pinamiy; o mimwamov pinamiy, o mikanig pinamiy igaw mo bilabeimiy. Youda babaw tut towen waseg ilabeimiy, o youda babaw igaw tut wanakougwaw mo bilabeimiy.

²³Peinan Kelis angamag yakids, mtowen Kelis Yowbad Natun.

Kelis nagamag abes igeg

4 ¹⁻² Kuninuways Kelis nagamag yakamey. Gamag babaw nag bikakins ansinap Yowbad. Kelis bo isekem mawotet vagan bakakatipel ansinap bakasekeimiy gamag yakamiy. Kadiloka bakawtel mawan beibwein.

³⁻⁴ Magat bukwatukins agusinap, aveiyag bwein, aveiyag kalbaleb; nag bukwatukins bwein. Nag kadilokeimiy. Nag kadilok kweitan gamag bikakin o bikaleiwag bwein. O yey mawan; nag kadilokeig bakakin bunik gunawotet. Wananoug adok gunawotet bwein, o yey nag bakakin kamnat. Igaw daGuyaws beim, mo bikaleiwag.

⁵ Nag kadilokeimiy bukwatukins wasigeis gamag siwotet. Igaw daGuyaws beim, mo bikamat adsinaps babaw-wan, aveiyag bwein, aveiyag kalbaleb; e, mo bikamat aveiyag nises wananouds. Yowbad mo bisekeids katanok katanok yakids mawan adsinaps; kukin bwein mo bikavasid; kukin gog nag, bo nag.

⁶ Sigwey, livnem amateiy soug Apolos bo alel vagan bukukwakins bwein, o kaleiwag bwein bukuvnases. Mata ge bukulansa, “Guntovek towen bwein, tayuwein kalbaleb.” Awoum!

⁷ Awoum kwaypamwes sinap. Amisinap Yowbad nisekeimiy; nag amisinap tatineimiy, nag.

⁸ Bo kukwamuweips yakamiy. Bo kuguyaws adok. Bo kukwaleiwags yakamiy; yakamey nag. Sivinag moundid bukukwaleiwags, vagan sigwey yakamiy bitakaleiwags babaw yakids.

⁹ Takaweins Yowbad anilivan yakamey adok bo ivagem mamagina toul yakamey, mamagina tasiyas takankanigs, vagan vena babaw gimgilis mo bikasigumimas; min-libalab adok o ven watinow gimgilis bikasigumimas yakamey.

¹⁰⁻¹¹ Yakamey mamagina takabalaweins yakamey, Kelis nawotet silmanin; o yakamiy mawan tassinaps yakamiy. Yakamey tougweys, tage yakamiy tatawtouns. Gamag ikavasimiy yakamiy, o yakamey nag, amamwasin kasesun-wan. Igaw amamoun, amadak, amakweim nag; gamag iyagagemas; mabunatum nag. Makaw-wan!

¹²⁻¹³ Kawwotet wanimem tatinem. Iyagemas tasiyas, nag kakatimop ages; kalivan bwein wasigeis tasiyas. Iyalebemas, nag aveiyag kavag; kasesun-wan. Ivtokemas livan; amalivan siwayoub kasekes. Bo nakamlavag kalbaleb gamag, mamagina sim, yakamey. Igaw-wan tut towen bo mawan.

¹⁴⁻¹⁶ Ta-balel mawan, vagan beivag amimwasin, nag. Deisa bamulimiy vagan beibwein amisinap, mamagina nitug bwanabwein yakamiy. Babaw gamag bikatimlakeimiy sinapun Yeisuw waseg; tage timamiy nag bibabaw, timamiy agumwanet yey. Peinan yey bo asekeimiy livanen

Yeisuw Kelis, vāgan kid bukusimounids towen waseg. Kadiloken-wan kukikunis gunaked.

¹⁷Mapun bo akayeb Timotiy biwekeimiy bikatimlakeimiy vāgan bukunuways agusinap. Tayakelesiys vena babaw akatimlakeimiy gunaked, peinan Kelis inaked. Timotiy mamagina natug bwanabwein; peinan ikaninow daGuyaws aygan bo imlavag natug yey.

¹⁸⁻¹⁹Gamag mwasanin ikaypamwes sinap, idokes kid ta-baw. Tage nuwanaw bo baw, magat daGuyaws nanon māwan; mo bakin sitawtoun tasiyas takaypamweins sinap, o nag, amāwan? Adok asilivan makaw.

²⁰Yowbad nakaleiwag nag mamagina livan makaw; nag. Yowbad nakaleiwag natawtoun waseg ikaleiwag.

²¹Aveiyag sivinamiy? Igaw bawekeimiy bakkāneimiy-wan? O nag, adok bo bimakwein woug? Takaleiwag yakamiy.

Taninagow

5 ¹Bo aligen kid teitan nises wasigeis yakamiy, ikanavaya mav. Ansinap singaya kalbaleb; peinan imasis son taman nakwav. Gamag siyas igaw dadub nag bininagows māwan.

²O yakamiy gog kwaypamwes sinap. Bo igak! Kadiloka bigeg ninoumiy, taninagow towen silmanin. Kadiloka kwayabes gamag towen, binoun.

³⁻⁵O yey kadiveiyov nases, magina kululuwag simiy tasesus; gunakaleiwag māwan: Kwatuyouns yakamiy, kululuwag yey simiy, bo bitakaleiwags; daGuyaws yagan waseg. DaGuyaws Yeisuw natawtoun waseg bo bitakaleiwags māwan. Bo bitakayabes taw towen binek Seitan vāgan biyageg won taw towen, mo bikatimov kululuwan, igaw yam towen daGuyaws beiyum beim.

⁶⁻⁸Kalbaleb nukwaypamwes yakamiy. Adok kutagouwāwes. Magat kalbaleb kakit nises, igaw sona mo bigeg. Kulavew kalbaleb towen nises wasigeis yakamiy, vāgan bukusesus bwanabwein. Mamagin Sagal Kaltuwon silmanin talavewas yist, bled kweivaw bwanabwein tagabus, bled makaw. Peinan sinap kalbaleb māwan yist. Kadiloka taw towen anmwānet kwayabes, peinan ansinap kalbaleb.

Sagal Kaltuwon bulukwan lamiy bo iweisy peinads, mtowen Kelis. Kadiloka bitassagals Kelis waseg, adsinaps nag māwan kweiboug, kalbaleb. Kadiloka nanouds katanok, didumwal, adsinaps māwana bled kweivaw bwanabwein.

⁹⁻¹⁰Kweiboug gunalet neiw, nalel mamagina, “Awoum simiyas takalbalebs kusesus.” Nag mamagina bukusinales tasiyas tassubwans, o tasiyas tamtimwamons, o tasiyas tavveinaws, o tamgamegs; kukin bukulisawes tasiyasa babaw, adok bo bukulisawes vena babaw.

¹¹Tage gunakaleiwag māwan: Kukin simiy teitan idok Yeisuw angamag tonen, mo bikanavaya mav, o biyageg son, o bimgameg, o biyaweid, o

biyyagay o bimwamoum wiskiy o aveiyag mo bikabalawein, o biveinaw, kadiloka kusinales gamag townen. Awoum bukwamtans simiy.

¹²⁻¹³Bo bitakaleiwags wasigeis tasiyas tayakelesiys; tasiyas watoulan awoum. Yowbad igaw bikaleiwag wasigeis tasiyas watoulan.

Peinan taw townen taninagow tayakelesiy teitan, kadiloka kwayabes, bein watoulan.

Yatal

6 ¹Kweitan sinap kalbaleb nises wasigeis yakamiy. Kuyateles simiy, wamatan takaleiwag gabman townen nag isimounid Yeisuw waseg. Bo igak! Magat bukuyateles, kadiloka kuneves tayakelesiys mwasanin bikaleiwags wasigeis yakamiy.

²Kuninuways, tasiyas iyakelesiys mounid igaw mo bikaleiwags youda babaw wasigeis. Igaw bukukwalawages youda babaw, adok ikadilokeimiy kakit sinap bukukwaleiwags, tut townen waseg, ne?

³E, kuninuways; igaw bitakaleiwags min-libalab wasigeis. Tab ikadilokeimiy bukukwaleiwags ven watinow? Adok ikadilokeimiy.

⁴⁻⁵Tut townen sivinamiy siyas toul bikaleiwags wasigeis yakamiy. Bo igak! Agulivan townen vagan beivag amimwasin. Adok tassinap teitan nises wasigeis yakamiy, kadilok townen bikaleiwag. Igaw simiy asteiy biyatel son, tassinap townen mo bikaleiwag.

⁶O nag gog, tut townen iyatel son, o townen takaleiwag nag isimounid Yeisuw waseg. Bo igak!

⁷Sinap townen singaya kalbaleb. Bweina kuses, kukin soum biyablebeim o biyagageim, bweina kuses. Sinap townen bwanabwein.

⁸O nag gog, yatal waseg kuyablebes simiyas, o kusilponays simiyas wasigeis, tayakelesiys babaw-wan yakamiy. Bo igak!

⁹⁻¹⁰Kukin amisinap kalbaleb ta-mawan bukusiws Yowbad nakabkaleiwag wanuwan, nag. Takalbalebs nag beisiws, nag; tasiyas ikaninavays mav, nag; tawaw, o vinay ikaninavays mav, nag; gamagal ikaninavaysa mav, nag; tamgamegs nag; tassubwans nag; takkaylas nag; tayablebeins pwadaw nag; tasimomons nag; tavveinaws nag; takwekways nag; tamwamweins wiskiy o aveiyag bikabalaweins, tasiyas nag; tasiyas tayyagays nag; tabbakews nag. Asibabaw nag beisiws Yowbad nakabkaleiwag, nag.

¹¹Kweiboug yakamiy mwasanin amisinap mawan. Nagein gog daYowbads bo iwid amisinap townen, ikayuseimiy, bo ikidumwal amisinap, daGuyaws Yeisuw Kelis waseg, o Yowbad Kululuwan waseg.

Awoum kusubwans

¹²Adok teitan yak bukulivan kid, kulana, “Kadilokeig sinap babaw.” E, mounid. Kadilokeid sinap babaw bitakow, tage sinap mwasanin nag

bikatimweisid. Awoum bamlavag mamagina sinap mwasanin natouwat yey.

¹³Kan toub silmanin, o toub kan silmanin; tage igaw Yowbad bigidem kan son toub. Taninuways-vak woun. Woun nag silmanin subwan, nag; woun silmanin daGuyaws; e, daGuyaws silmanin woun.

¹⁴Yowbad natawtoun waseg ivag, Yeisuw mo ikit vayuwein; igaw yakids mawan.

¹⁵Taninuways wouds mamagina wuliyougwan Yeisuw Kelis won tonen. Nag kadilok bitamlavags mamagin wuliyougwan nawlayas. Awoum.

¹⁶Kukin kal imasis son nawen nawleyas ikatuvases son, wous asteiy imlavags mamagin wous katanok. Livan nises Bukitab waseg, “Tasiyas asteiy ilatan wous katanok-wan.”

¹⁷Tage kal ikatuvases son daGuyaws, kululuwes katanok-wan.

¹⁸Kadiloka kupiyaves sinap towen kaninavaya mav. Sinap babaw kalbaleb gamag bivag mo biyageg son teitan; tage kal bikanavaya mav mo biyageg won tatonen.

¹⁹⁻²⁰Taninuways wouds yakids mamagina nabunatum Yowbad Kululuwan Town Bwanabwein. Bo iyamiyiseids Yowbad. Mtown tanuwagan yakids. Yey nag tanuwagan; yakamiy nag tanuwagan; Yowbad tanuwagan. Maysads yakids, Yowbad Natun. Mapuna ikayus wouds yakids. Kadiloka bitakayuses wouds silmanin sinap bwein; mo bikalin nuwan Yowbad.

Veivay

7 ¹⁻²O millet neim waseg yey. Sinapun veivay nukwatugans waseg yey. Nanoug bo mawan: Magat yakamiy tawaw nag bukunekes vinay, sinap towen bwein. Tage nag kadilok. Peinan gamaga babaw ikaninavaysa mav, kadiloka kuveivays, teitan taw nakwav tonen, teitan taw nakwav tonen. Awoum bimasis tobwag gamag son.

³Kukin taw bikanavays son nakwav, awoum bisilbwed, peinan nakwav. O kukin vin bikanavays son namwan, awoum bisilbwed, peinan namwan.

⁴⁻⁵Kukin taw sivinan bimasis son nakwav, awoum vin bikayus won tatonen; taw bikaleiwag. Mawan-vak, kukin vin sivinan namwan bimasis son, kadiloka beitam.

Misinaka bivatom nakwav waseg o namwan waseg, mo bimasis tanaban tut nag biveiyov vagan binnitougs Yowbad waseg. Beikous, mo bilatans, bimasis son. Kukin gog bimasis tanaban tut kadiveiyov adok Seitan mo biyakwanes, peinan iwayay wous.

⁶⁻⁷Kalisiy sivines beivays, bweina beivays. Kukin teitan sivinan bisesuna anmwanet, bweina bises. Adok bweina gamag babaw bisesus mawan yey. O adok nag, peinan Yowbad ikaleiwag teitan gamag isek kweitan sinap, o teitan gamag kweitan sinap.

⁸⁻⁹Adok nakubukwabs o nakwabs bisesus māwan yey, sinap towen bwein-wan. Kukin nag kadilok bikaptules, bweina beivays tasiyas. Wous biwaways kalbaleb; beivays bwein-wan.

¹⁰⁻¹¹Tasiyas kweiboug neivays, daGuyaws nakaleiwag māwan (yey gunakaleiwag nag; daGuyaws nakaleiwag): awoum vin bipiyev namwan. Magat nipeiyaws kweiboug, manāwen vin inaked akweiy bwein-wan. Kweitan ked bisesun-wan. Kwayuwein ked beiyum binek namwan. Tawaw māwan, awoum bipiyaves sikwavas.

¹²Kukin kal iyakelesiy o nakwav nag isimounid Yeisuw waseg, o nāwen sivinan bisesus son, awoum taw bikayeb; bweina bises nakwav. Nanoug bo māwan. Nag kaleiwag Kelis isekeig; misinaka nanoug yey.

¹³Māwan-vak, kukin kal vin iyakelesiy, o namwan nag isimounid Yeisuw waseg, o towen sivinan bisesus son, awoum vin bipiyev namwan towen.

¹⁴Magat vin ansinap bwanabwein, o namwan ansinap igeg; adok igaw taw mo bikayles nakwav ansinap bwanabwein. O magat taw ansinap bwanabwein, o nakwav ansinap igeg; adok igaw vin mo bikayles namwan ansinap bwanabwein. Kukin nag beibwein asisinap bo bigeg asisinap nitimiyas. Tut gog towen nisesus bwein.

¹⁵⁻¹⁶Magat vin kavel nag isimounid Yeisuw waseg, o namwan isimounid Yeisuw waseg, o vin sivinan bilisow namwan, bweina binoun. Awoum bikayus. Bikayus, adok bikamnimsa son. Yowbad nag ivag sivinan kamniman. Vin nāwen bweina binoun. O magat taw kal nag isimounid Yeisuw waseg, o nakwav isimounid Yeisuw waseg, o taw sivinan bilisow nakwav; bweina bilisow, binoun. Igaw nakwav bisimounid Yeisuw waseg? O nag? amāwan? Nag bitakakins. O vin namwan igaw bisimounid Yeisuw waseg? Nag takakins.

Awoum tapiyev ābad

¹⁷Yakids babaw tasesus, teitan gamag kweitan wotet, teitan gamag kweitan wotet, māwan Yowbad nakaleiwag. Bweina tases wakabad tatoneid. Adibakeimiy tayakelesiys amibabaw māwan.

¹⁸Kal momwan nibob mamagin Ebelam nakabivatus, igaw Yowbad bidow, mo bisimounid Yeisuw waseg; awoum bigeg nanon nakabivatus silmanin. Kukin nakabivatus nag, awoum bibob momwan. Bweina bises.

¹⁹Anaboub momwan nag bivakaein wotet; o momwan bises, sinap towen nag bivakaein. Misinaka takanaweins Yowbad nakaleiwag siwotet bwein, avakaein.

²⁰Amāwan muwotet; tutan Yowbad bikatigikeim vāgan bukuyakelesiy, awoum kupiyev muwotet tatoneim; e, kadiloka kuwotet bwein.

²¹Kukin bukuwtel mutovek nawotet, awoum bigeg nanoum. Igaw bikaleiwag bukuyum, bweina kunoun.

²²Kukin Yowbad bikatigikeim, vagan bukuyakelesiy, mutovek natouwat ven watinow yəkoum, Yowbad bo bilikum sinap kalbaleb waseg, mo bukumlavag mamagina guyaw yəkoum. O kukin bikatigikeim, magat guyaw yəkoum, bo bukumlavag Kelis natouwat yəkoum.

²³Maysads yəkids Yeisuw nisen, mo ikaweids angamag yəkids. Nag kadilok bitamlavags sitouwat ven watinow gimgilis.

²⁴O soug yəkoum, amawan muwotet, igaw daGuyaws nikatigikeim, awoum kupiyev muwotet; peinan Yowbad sod tases.

Nakubukwabs

²⁵⁻²⁷Livanen nakubukwab nukwatugans waseg yey. Nag kweitan livan daGuyaws isekeig, nag. Misinaka ilabeig, nanoug waseg isekeig sinap. Adok kadiloka kusimounids agusinap towen. Peinan tut towen kalbaleb, adok kadilok gamag babaw bisesus-wan. Kukin mukwav sam, bweina kusesus. Kukin mukwav nag, bweina kuses mav.

²⁸Taveivay nag ivag kalbaleb; tage kalisiy beivays mo singay bigeg abes. O peinan tut towen singaya kalbaleb, nag sivinag abamiy bigeg.

²⁹⁻³¹O sigwey, agulivan mamagina, “Kakit beikous tut towen ven watinow waseg.” Igaw siyas sikwavas sam, bweina bisesus mav, mawana tasiyas sikwavas nag, nisesus mav. Tavvɔlams bweina bisesus mawana tasiyas nag ivalams. Tasiyas tammwasaws bweina bisesus mawana tasiyas nag imwasaws. Tasiyas iyamiyises sivavag, bweina bisesus mawana tasiyas siwliyoug nag. O tasiyas iguyaws, bweina bisesus mamagina tasiyas toul. Peinan kakita beikous sikaleiwag ven watinow. Kaleiwag kweivaw mo bisilamaw. ³²⁻³⁴Awoum bibabaw nanoum. Kukin mukwav sam, nanoum waseg youda babaw, ven watinow wuliyougwan, aveiyag sivanan mukwav. Kukin mukwav nag, nanoum katanok-wan, anmwanet daGuyaws nakaleiwag, aveiyag sivanan. O vinay simwanas sam, ninous wasigeis youda babaw, ven watinow wuliyougwan, aveiyag sivines simwanas. O nakubukwabs o vinay, simwanas nag, waninous anmwaneta daGuyaws nakaleiwag, aveiyag sivanan. Vinay tasiyas ikayuses wous o kululuwes silmanin daGuyaws nawotet.

³⁵Bo alivan mawan, vagan balabeimiy; nag vagan basilbwed miked, nag. Agulivan towen vagan kid bukusesus bwein; sivinag bukuwotets daGuyaws nawotet waseg, ninoumiy bo katanok-wan.

³⁶Kal angamag nakubukwab, bikayus, bikaleiwag bo bisesusun-wan; tage kukin bigeg nanon peinan bo iwnabwat, namwan gog nag; o sivanan beivays son namwan, bweina beivays; nag ivag ansinap kalbaleb, bwein-wan.

³⁷O kukin gog, towen nanon katanok, o sivanan nakubukwab bisesusun-wan, o nag kweitan gamag biyageg nanon; o nakaleiwag vagan bisesusun nakubukwab, bweina bikayus; nag ivag ansinap kalbaleb, nag.

³⁸Kukin kal beivays son nakwav, ansinap bwein-wan. Kukin gog nag beivays, singay bwein ansinap towen.

³⁹Vin kavel namwan mwamov, bo ilātans son. Kukin namwan bikanig, bweina bivevaw; tage kadiloka beivays son gamag kamnat, daGuyaws angamag teitan, kavel sivinan.

⁴⁰Kukin gog bisesun-wan, singaya bwein ansinap manāwen vin. Nanoug māwan. Adok Kululuwan Yowbad nanon bo māwan.

Kan imgwavis

8 ¹Kweitan livan nukwatugans waseg yey, livānen kan towen ivisan, tasiyas igaw dadub imgamegs waseg. Kulivans, “Tayyaweids tasiyas. Sinap babaw kakakin yakamey”; tage yak kudok amsinap avakaein, mo kwayapam, bo igeg amsinap; kadiloka gog bukusiwayoub mo bikatimweis amsinap bwein.

²⁻³Kukin kal towen nag isiwayoub mo idok tassinap tonen, nag ikakin bwein. Kukin bisiwayoub waseg Yowbad, Yowbad mo bikakin taw towen takamnat.

⁴Kulivans kid, “Yowbad anmwānet. Tasiyas imgamegs siyowbad wasigeis, o kaeis ikamkwams, ivavagsa mav.” E, moundid.

⁵⁻⁶Kukin yowbad bibabaws ven watinow o walbalab, o guyawaw bibabaws, tayyaweids gog tasiyas. Peinan daYowbads anmwānet, Tamads, nibun youda babaw, o mwamovads isekeids silmanin towen. DaGuyaws kid anmwānet Yeisuw Kelis; o Yeisuw son Taman ibubun youda babaw, o ibunids-vak yakids.

⁷Gamag mwasanin nag bikakins Yowbad anmwānet. Mwasanin igaw dadub nisesus; nagein gog mo ikawes sinapun Yowbad, o nag ikawes bwein; idokes yowbad babaw nisesus; o iwenes kan towen ivisan-wan, peinan nimgwavis. Tasiyas igaw beikams, mo biwenes Yowbad, peinan Yowbad nag ivag sivinan meg.

⁸Tage nag kweitan kan bitakoum, vāgan Yowbad bisiwyoubud, nag. Kan towen, bitakoum, nag bikatimweisid, nag. Bitapiyev, nag biyagageid, nag.

⁹O peinan yakoum amsinap avakaein, o sod gog ansinap igwey, awoum kuyageg sod.

¹⁰⁻¹²O sod, igaw teitan bikineim bo kukwam kan towen ivisan-wan, teitan neimeg waseg; o sod igaw beikam, mo bikubukub nuwan peinan iwen meg. Yakoum amsinap avakaein, bukukwam, nag aveiyag bukulivet; tage bo bukuyageg sod. O Kelis nikanig sod peinan, vāgan biyamov, awoum ge kuyageg sod. Kukin amsinap māwan bukuyageg sod, māwana bo kuyageg Kelis.

¹³Magat kag kweitan biyageg sod, bo bapiyev kan towen. Nag kweitan tut bakam; nag. Awoum bayageg sod; awoum.

Takaweins livānen Yeisuw

9 ¹Awoum teitan gamag bikaleiwag waseg yey. Guntovek anmwānet Yowbad. Gunawotet akokew livānen Yeisuw. DaGuyaws townen bo akin wamatag; o yakamiy nukuliganes livan townen; yakamiy mamagina gunawotet anagin yakamiy, daGuyaws Yeisuw waseg.

²Gamag mwasanin bilivans, “Townen Paul, nag takawein livānen Yeisuw”; yakamiy gog kukwakins mounid gunawotet townen; o livānen Yeisuw bo asekeimiy. Gamag mwasanin bikineimiy, nukumlavags daGuyaws angamag yakamiy, mo bisimounids Yeisuw nawotet waseg yey nises.

³Tasiyas ivtokeigs livan, akatimop asilivan livneimiy waseg, peinan nukumlavags daGuyaws angamag yakamiy.

⁴O peinan gunawotet townen, kadilok bukuvakamugs yey.

⁵O magat gunakwav sam, tayakelesiy nātan, kadilok bukuvakamumas; peinan tayakelesiy ivakamus sikwavas tasiyas takaweins livānen Yeisuw, o sikwavas budan Yeisuw, o nakwav townen Pita.

⁶O nag gog, amateiy soug Banab kawotet wanime silmanin bakakam. Peinan takaweins livānen Yeisuw yakamey, maysan wotet bakakam? o nag? amāwan?

⁷Tabta tasiyas gabman māwana sitakannaviys binineivs kaeis tatineis, ne? Adok nag. Maysan wotet beikamsa mav. Tabta tasiyas tasapweins kan bisesus asimoun, ne? Adok nag. Anagin wotet bo beikams. Tabta tatuyein kweitan gamag alen bises anamoun ne? Adok nag. Bo beikam.

⁸⁻¹⁰Sinapun ven watinow townen; o Moses nakaleiwag-vak nises mamagina:

“Bulumakaw iwotet wit waseg, bweina beikam wit anagin.”

Tabta kaleiwag townen peinan Yowbad ikalin nuwan bulumakaw? Adok nag. Adok nakaleiwag townen peinan ikalin nuwan yakids. Adok anakabebay townen, kweiboug nilel vāgan kid tasiyas tawteleins Yowbad nawotet, mo bikawes kaeis beikams. Tasiyas tawayins yagoug sisiyas tatayaweins kan inmises igaw kaeis beikams. Māwan ge tawteleins Yowbad nawotet igaw beikams mav, maysan wotet.

¹¹O peinan Yowbad anilivan waseg nakavkamumiy, mapuna kaeimiy kadiloka kuvkamumas.

¹²Peinan kuvakamus gamag mwasinis igeiguys wasigeis yakamiy, tage kadiloka singaya bukuvkamumas yakamey. O nag ivag sivinem kaem bukuvkamumas, nag. Bweina bakases amamoun. Kukin makaleiwag bimouvit wasigeis yakamiy, adok mo bukupiyaves Kelis nasiwayoub bwanabwein wasigeis yakamiy.

¹³Kukwakins gog tasiyas iwotets Yowbad wanbunatum, kaeis ikawes, maysan wotet townen. Lun bulukwan iweiys ikous, mo ilakes, ilagus, amtowen bigob Yowbad silmanin, amtowen bisemos kaeis tatineis.

¹⁴ Mawana daGuyaws ikaleiwag pines tasiyas takaweins anilivan bwanabwein, anagin wotet kaeis beikams.

¹⁵ O yey gog nag sivinag maysan gunawotet kag bakow, nag. Sivinag bawotet mav. Nag balel let towen vagan kag bukusekeigs, nag. Awoum bakayus kag towen. Bweina agumoun bakanig. Bweina bawoteta mav, bakanig agumoun. Awoum bimouvit gunakaleiwag wasigeis yakamiy.

¹⁶ Kukin bakow livan towen bwanabwein, livanen Yeisuw, gamag nag bikavasigs. Kadilok bo bavag mawan. Kukin nag bawtel wotet towen, bo bigeg nanoug, adok bo balouvat kalbaleb.

¹⁷ Kukin nanoug mawan bo bawtel gunawotet, igaw maysan gunawotet mo bakow. Tage silawun gunawotet Yowbad nakaleiwag. Awoum bawotet silmanin maysag; awoum. Peinan Yowbad nakaleiwag waseg yey, kadiloka bawoteta mav.

¹⁸⁻¹⁹ Na-ivag maysan gunawotet. Sivinag bawoteta mav, mo beibwein nanoug. Peinan basekeimiy livanen Yeisuw, livan towen bwanabwein, kadiloka kuymiyiseigs. O nag, sivinag bawoteta mav. Nanoug bo mawan. Nag teitan kadilok bikaleiwag waseg yey, nag; tage bo amlavag magina babaw gamag sitouwat yey, vagan biliganes livanen Yeisuw, namagleis-e gamag meivek-wan.

Gamag asisinap kweitan kweitan

²⁰ O ivag agusinap mawana gum-Yudiy yey, vagan kid tasiyas min-Yudiy mo biliganes Yeisuw nakaleiwag. O magat bakases sigwey tasiyas takanaweins Moses nakaleiwag, mo bamlavag magina tasiyas, vagan kid tasiyas mo biliganes Yeisuw nakaleiwag. Tage Moses nakaleiwag nag bitawtoun waseg yey, nag.

²¹ O magat bakases sigwey tasiyas tadadubs, watoulan Moses nakaleiwag nisesus, mo beivag agusinap mamagina tasiyas, vagan kid tasiyas mo biliganes Yeisuw nakaleiwag. Tage nag bapiyev Yowbad nakaleiwag, nag; tuta babaw akokew Yeisuw Kelis nakaleiwag.

²² Tougweys sigwey bakases, mo bamlavag mamagina tougwey yey, vagan tasiyas biliganes Yeisuw nakaleiwag. O tasiyas sigwey, asisinap kweitan, bamlavag mamagina tasiyas, vagan biliganes Yeisuw nakaleiwag, mwasanin tasiyas. O gamaga babaw sigwey nakases, agusinap mawan.

Itawtoun vagan biwtel nawotet bwein

²³ Gunawotet towen babaw awtel, peinan sivinag bakokew livanen Yeisuw Kelis, o sivinag gunawotet towen bawtel beibwein, mo bamwasaw waseg.

²⁴ Bitaninuways, kalisiy igaw mo bimwasaws? Magat babaw bikawlideiys bisisawls wavtakon ven, tatanok bitamap, maysan mo bikow.

O yākoum māwan, kadiloka kunoun wamked ven watinow, mutawtoun waseg, vāgan kid maysan mo bukukow.

²⁵O tawtelein wag itas kalālav, iwtel bwein, silmanin igaw wag babaw mo bikavvalaks bisisawls, nawag makaywen mo bitamap. Maysan gog bikow. Nag bivakaein maysan. O yākid gog bitawtel dawotet bwein, igaw maysad avakaein mo bitakow; maysads towen bo bisigeg.

²⁶⁻²⁷O yey, asawl vāgan batamap kid; akavaveis bunik vāgan wag bidumwal; akaleiwag waseg woug tatoneig vāgan sinap tawtoun bakow. Yey bakaleiwag, woug nag. Magat woug bikaleiwag agusinap kalbaleb, maysan bwein nag bakow, nag. Magat basekeimiy livānen Yeisuw, o woug igaw mo bikaleiwag agusinap kalbaleb, maysag bo biyamkwaneig.

Tobwag Yowbad

10 ¹⁻²O sigwey, taninuways tammwayas wanawoud pwamug-o, Yowbad isen wakunuwtes lov imgwayes, o igaw Yol Bwabwel isilbwed siked, isiws wanuwan, ineis, isaps palatan. Mamagin ibaptayases Moses waseg, lov waskawan o yol wanuwan, peinan itams Moses nakaleiwag waseg.

³⁻⁴O siyas babaw nikamkoums libālab kan-nen, nimwamoums libālab sipinen; mtowen sisiy ineis yagan Kelis, mamagina dakul ibwabwab yevagam, peinan yam babaw kululuwes imwamoums libālab sipinen, towen Kelis iwmwamwes kululuwes tasiyas.

⁵Tage Yowbad nag ikalin nuwan tasiyas babaw, mapun ikankanigs; wous tasiyas ikatigayays wanawoud, ven makaw, waseg.

⁶⁻⁷Youd tasiyas ilivatus adsinaps silmanin, vāgan bikatimlakeids, mo bitakawes adsinaps bwein; awoum sivinads sinap kalbaleb māwan tasiyas; awoum bitayousis yowbad tobwag māwan tasiyas niyousis. Peinan kweiboug nivages māwan, livānen nises Bukitab waseg, mamagina, “Isinis kid beikams kan, o beimoums; wankuyeim mo itamanaws kalimwasaw silmanin, iwliwals sisiyas. E, iwliwals tobwag yowbad silmanin.”

⁸Awoum takanavaysa mav, māwan tasiyas kweiboug, yam katanok waseg mo ikabalamats singay babaw tawsans, sinawey kweitoun tawsan gamag imtamats ikous.

⁹Awoum tayakwanes daGuyaws, māwan tasiyas ivtokes livan, kan silmanin; wankuyeim mo isekes mwatet ibsibas tasiyas, ikankanigs wanawoud.

¹⁰Awoum tavgokays livan, māwan tasiyas ivtokays livan, mo ikayeb tawayin gamag, iwaweis gamag tasiyas, imats.

¹¹Ilouvats youd tasiyas kalbaleb, vāgan kid yākids-vak mo bitakakins sinap bwein; peinan kweiboug sinap babaw mo ilivatuds, nagein, nakabiyokous tut waseg.

¹²Kukin kal idok ansinap tawtoun, kadiloka bivnas, mata ge bikalouw, sinap kalbaleb waseg.

¹³Aveiyag talivatus biyakwaneids, kweiboug niyakwanes gamag babaw wasigeis. Yowbad gog moundid bo bilabeids, nag beitam sinap kweitan biyakwaneids vagan bibinak wouds, nag. Dakabiyokons towen, magina dakul silupouy; talivatus wabwanit; Yowbad gog bikatimlakeids aniked mo bitalavays; mamagin bitatawtouns waseg dakabiyokons, kweitan kweitan.

¹⁴⁻¹⁶E sigwey, kuninuways. Kadiloka kupiyaves yowbad tobwag. Peinan tassinap yakamiy, kukwakins agulivan moundid. Kelis nakwavig towen nisiwyoubuds waseg; o kalin nuwads silmanin; e, tamwamoums mamagina buyavin tonen. Sods Kelis, mo tamlavags katanoka bod yakids. Mawan kan towen takivis takams, mamagina won Kelis tonen, tamlavags katanoka bod yakids, peinan talaṭans sods Kelis.

¹⁷Peinan kan katanok-wan mamagina bled katanok, o yakids babaw gamag takams kan towen katanok-wan, mo tamlavags katanoka bod yakids, peinan kads katanok-wan.

¹⁸Kuninuways min-Yisleil asisinap. Tasiyas tanuwgwes-lun iwaweiys lun bulukwan, mwasanin igabus wakabeilun, mwasanin isemos kaeis beikams; mamagina bo ilaṭans waseg Yowbad nakabeilun.

¹⁹⁻²⁰Taninuways kan imgwavis tobwag yowbad silmanin, iyyaweids-wan; o yowbad tasiyas iyyaweids-wan. Tasiyas igaw dadub nag beiluns waseg Yowbad, tage iluns waseg baloum. Awoum bukulaṭans simiyas baloum.

²¹⁻²²DaGuyaws nakabninuway kwavig-nen nises; baloum nakwavig nises. Nag kadilok kwaviy bukumoum. Nag kadilok bukukwams daGuyaws napwasiw waseg, mo bukukwams baloum napwasiw waseg; awoum. Bitavages mawan mo bikamliweids Yowbad. Awoum bitasilkodes daGuyaws, mata bigeg nanon. Ta-mawan bitatawtouns waseg.

²³⁻²⁴Kadilokeids sinap babaw bitakow, tage sinap mwasanin nag bilabeid, vagan bitatawtoun, nag. Kadilokeid kan babaw bitakams, tage kan babaw nag bilabes sidayas. Kadiloka beivag sivinad sidayas sikamnabwein, dakamnabwein tatoneid awoum.

Viniyon imgwavis

²⁵Kadilok bukukwams kana babaw. Viniyoun aveiyag kugimwel bweina kukwam. Igaw bukugimwal, awoum kukwatugan, kulana, “Viniyon towen imgwavis? o nag?” Kukin teitan bilivan, “Viniyon towen bo imgwev kid,” adok bo bigeg nanoum.

²⁶Bweina tatagouwaw yak kukwama mav; peinan, “Tanuwagan ven watinow daGuyaws; mtowen tanuwagan youda babaw nisesus waseg.”

²⁷Magat soum nag isimounid Yeisuw waseg, o bilana, “Kum kukwam,” o sivinam bukukwam, bweina kukwam. Awoum kwatugwan, kulana, “Kan towen kumgwev tan, ne?” Awoum! Deisa kukwam-wan.

²⁸Tage kukin gamag teitan bilivan, “Viniyon towen bo imgwavis siyowbad silmanin”; awoum kukwam kan towen. Bukukwam mo bigeg soum nanon.

²⁹⁻³⁰Nanon soum bikaleiwag, nanoum yakoum nag. Awoum ge soum bigeg nanon. Adok kulana, “Ampalawen sivinag bweina banoy. Aveiyag sivinag bweina bakam. Aveiyag wawun nanon soug bikaleiwag? O magat bikalin nuwag kan towen bakam, aveiyag wawun bivtokeigs livan, gamag mwasanin?” Awoum bukulivan manawan.

³¹Awoum! Kadiloka bukuvages youda babaw yakawanan Yowbad silmanin. Kan aveiyag bukukwams, o aveiyag bukomoums, kadiloka kuvages vagan gamag biyakawns Yowbad waseg.

³²Awoum bitavages kid aveiyag mo bigeg ninous sidayas; takinew sidayas min-Yudiy, o takinew tobwag ven gimgilis, o takinew natayakelesiys Yowbad. Awoum bitavages kid aveiyag mo bigeg ninous sidayas.

³³Nanoug yey, bo bavag vagan beibwein ninous babaw gamag. Nag ivag sivinag gunavavag babaw; nag. Sivinag kid aveiyag mo bilabes sidayas, vagan Yowbad bikatinabwes tasiyas, mo bimwasaws kid.

11 ¹Manawana yey akabkun inaked Yeisuw Kelis; mapun yakamiy kwabkunis ked towen.

Kweim kalbaleb

²Bo ikalin nuwag peinan kuninuways o kuyousis kaleiwag towen nasekeimiy.

³Kweitan youd nises. Sivinag bukuwakinsa Kelis bikaleiwag tawaw wasigeis; tawaw bikaleiwags sikwawas wasigeis; Yowbad gog ikaleiwag Kelis waseg.

⁴Kal taw bigeiguy o binitoug Yowbad waseg, igaw antanugweib wakunun, bo biyageg datoveks.

⁵Kukin kal vin bigeiguy o binitoug Yowbad waseg, anakweim kalbaleb, mo namwan beivag anmwasin. Sinap towen manawan magina kunun bibob beikous bikakunaduy; mo beivag anmwasin waseg.

⁶Kukin vin bisikam anakweim kalbaleb, kadiloka mo bibob kunun beikous, bikakunaduy. O kukin nag sivinag bikakunaduy, kadiloka bisikam anakweim bwein.

⁷Nag kadilok kudataw bisen antanugweib buntuman tapwaloul wanuwan, peinan kudataw magin manawana Yowbad, yakawanan Yowbad silmanin, o kudavin yakawanan taw silmanin.

⁸Yowbad wanmugwana nibun kudataw, taw waseg mo ibun kudavin; ta-imug kudavin; nag. Taw imug.

⁹Ta-ibun taw, vin silmanin; nag. Ibun vin, taw silmanin.

¹⁰Mapun, vin kadiloka bisikam anakweim bwein, peinan min-libalab bikines.

¹¹DaGuyaws inaked waseg, gamag beivays ikous, kadilok vin son namwan asteiy bikaleiwags; awoum anmwānet gamag bikaleiwag.

¹²Peinan Yowbad nibun vin, kudataw waseg, wankuyeim vinay ikopwes tawaws; e, silawun youda babaw Yowbad waseg.

¹³Ninoumiy yakamiy amawan? Kadilok vin binitoug Yowbad waseg, anakweim kalbaleb? o nag? amawan?

¹⁴⁻¹⁵Kukwakins ven watinow sinapun; vinay bweina bisikams asikweim bwein, kunus vayvayov, silmanin yakawanes; tage awoum taw bisikam vin anakweim; kunun awoum bivag magina vin kunun, nag; bo beivag anmwasin.

¹⁶Makaleiwag mawan. Magat teitan gamag sivinan bitakamnians sods, nag kweitan kaleiwag nises; nag. Nag kweitan kaleiwag nises tayakelesiys wasigeis.

DaGuyaws inakamkwam

¹⁷Kweitan livan asekeimiy, o nag bakavasimiy youd towen waseg. Tutan kwatuyouns yakamiy, nag ivag amisinap bwein, singay kalbaleb.

¹⁸Peinan mitapwaloul waseg, bo aligen kulivis mibod yakamiy, kuvages bod babaw, o kakit bo asimounid livneimiy towen.

¹⁹(Kadilok gog bukulivis vagan bitakakins kalisiy yakamiy amisinap bwein, o kalisiy asisinap kalbaleb.)

²⁰⁻²¹Kwatuyouns yakamiy nag bukukwams bwein daGuyaws inasagal, peinan tatanok tatanok yakamiy kukwams kaeimiy tatineimiy; teitan isesunwan anamoun, tayuwein igovek, tatounun gog imoum, mo ikabalawein.

²²Tabta mibunatum sam bukukwams o bukumoums waseg, ne? O adok bukkwasigumis Yowbad angamag, tasiyas katuyouns nimeis; peinan ivag asimwasin tasiyas tasimavs. Aveiyag balivan? Tabta bakavasimiy youd towen silmanin? Adok nag.

²³⁻²⁴DaGuyaws bo isekeig sinap towen nasekeimiy mawan: misumkwey inavamul teitan bisilkod Yeisuw; e, boug towen, Yeisuw mo ikow bled wanaman, ikalin nuwan Yowbad waseg, ikiv, isekes beikams, ilana, “Towen woug pinamiy yakamiy. Kadiloka kuvvages mawan, vagan bukunuweigs yey.”

²⁵Ikams ikous, mo ikow kwavig, ilana, “Kwaviwen kwavig silmanin kaleiwag kweivaw, buyavig tatoneig waseg. Kadiloka kuvvages mawan; igaw bukumwamwes, vagan gog bukunuweigs.”

²⁶Igaw bukukwams kan towen, o kwavig mkwaviwen bukumoums, bukukwamats daGuyaws nakanig. E, kuvvages mawan ee... mo beiyum beim daGuyaws towen.

²⁷Mapuna kal beikam mav kan towen, o beimoum mav daGuyaws nakwavig mkwaviwen, gamag towen ansinap kalbaleb, biyageg won daGuyaws, o biyageg buyavin daGuyaws.

²⁸Kadiloka tanuways adsinaps tatoneids, aveiyag bwein, o aveiyag kalbaleb; wankuyeim mo bitakams kan townen, o bitamoums mkwawiwen kwavig.

²⁹⁻³⁰Kal yak kukwam mav o kumoum mav, nag kukwakin won townen, igaw Yowbad mo bikatimop amsinap to kalbaleb. Tut townen, amisinap māwan, mapuna kuguyagweys babaw yakamiy, o kukwatouns, o kumtamats mwasanin yakamiy.

³¹Kukin bitaninuway adsinap, aw-sinap kalbaleb bitapiyev, Yowbad nag bimop adsinap kalbaleb.

³²Tut townen waseg daGuyaws bimop adsinap kalbaleb, vāgan bikākin matads; tage igaw tut wanakougwaw nag bikamtanid. Bo bikamtanid sidayas takalbalebs; yakids nag.

³³O sigwey, igaw bukukwams tapwālou townen waseg, kadiloka bukwaymates simiyas.

³⁴Kukin teitan beivag anamoun, kadiloka beikam wanbunatum tatonen; vāgan nag beivag amisinap kalbaleb. Beivag amisinap kalbaleb, Yowbad mo bimop amisinap to kalbaleb. Kaleiwag townen nasekeimiy. Kaleiwag mwasanin nisesus; igaw bawekeimiy, mo balivan.

Kululuwads wuliyougwan

12 ¹Sigwey nukuleles livānen kululuwads wuliyougwan. Sivinag bukukwakins sinapun townen.

²Bo kunuwes kweiboug, igaw dadub yakamiy, yowbad tobwag nukuyousis; yowbad tobwag nag kadilok bilivans; tayyaweids tasiyas. Tage nukukwawes asisinap tasiyas, sikaleiwag katanok katanok bo kuyousis.

³Mapun adibakeimiy yakamiy, nag kal bilivan Kululuwan Yowbad waseg, mo bitouyeg Yeisuw, nag. Misinaka Kululuwan Townen Bwanabwein binek gamag, mo bilana, “DaGuyaws anmwānet Yeisuw.”

⁴Wuliyougwan kululuwads singay babaw, tage anmwānet Kululuwan Townen bo ivgen isekeids.

⁵Wotet māwan, singaya babaw, tage datoveks anmwānet-wan.

⁶Sinap māwan singaya babaw, Yowbad gog anmwānet-wan ikaleiwag teitan teitan wasigeis, silmanin dawotets bitawteles kweitan kweitan.

⁷O dawotet kweitan kweitan Yowbad Kululuwan bo isekeids vāgan bitalabes sidayas.

⁸⁻¹⁰Bo ivgen isek teitan ansinap vāgan bilivan bwein, teitan isek ansinap vāgan bikamtel livan moundid; teitan isek nasimounid tawtoun Yowbad waseg; teitan isek natawtoun vāgan bivag beibweins takatouns; teitan Yowbad nabubun tawtoun biwtel; teitan bipalopisay Yowbad anilivan; teitan bikakin kalisiy tayyaweids o kalisiy siwotet moundid Yowbad Kululuwan waseg; mayen teitan billivan wasigeis kaeig kweitan kweitan; teitan gog bikakin bikativin kaeig tasiyas.

¹¹ Kululuwan Townen anmwānet ivgen isekeid yākids tatonok tatanok, māwan bikaleiwag, mo biwteles wotet townen.

¹² E, woun katanok, tage wuliyougwan woun babaw; māwan-vak Kelis katanok, o yākids babaw magina wuliyougwan Kelis.

¹³ Kululuwan anmwānet waseg ibaptayseids mo tamlavags mamagina woun katanok. Takinew min-Yudiy yakamey, o mina-Gilis yakamiy, takinew touwat yak, o takinew tamwey yak, Kululuwan Townen anmwānet waseg iwmwamweids babaw yākids.

¹⁴ Wuliyougwan woun nag katanok, singay babaw.

¹⁵ Kukin kwakway bilivan, “Peinan nag nim yey, adok nag wuliyougwan woun yey,” moundid anilivan, ne? Adok nag. Wuliyougwan woun townen kwakway.

¹⁶ Māwan teg bilivan, “Peinan nag mat yey, adok nag wuliyougwan woun yey,” moundid anilivan, ne? Adok nag. Wuliyougwan woun townen teg.

¹⁷ Kukin woun bikālawt matan waseg, ta-māwan biligen. O kukin woun bikālawt teigan waseg, ta-māwan biskwen manisin.

¹⁸ Yowbad nakaleiwag bo ibun woun wuliyougwan babaw-wan, siwotet kweitan kweitan, māwan nanon Yowbad.

¹⁹⁻²⁰ Magat wuliyougwads katanok, nag beivag wouds tatonen. Tage woun wuliyougwan babaw, woun gog katanok-wan.

²¹ Nag kadilok mat bidibek nim, bilana, “Nag sivinag yākoum.” Māwan kunukun; nag kadilok bidibek kwakway, bilana, “Nag sivinag yākoum.”

²²⁻²³ Nag! Magat wuliyougwan won aveiyag gamag idok nag ivag sivanan, tatagouwaw gamag townen; singay gog sivanan wuliyougwan townen. O aveiyag idok yakawanan nag, singay iyakawanes wuliyougwan townen; tavnāses bwein wouds wuliyougwan, aveiyag admwasins waseg, mo talumwes, tavnāses bwein.

²⁴ Wouds wuliyougwan babaw ilātans, imlavag wouds katanok; Yowbad bo ibun māwan. Wuliyougwan aveiyag yakawanan kakit, Yowbad ivag vagan yakawanan bivakaein kid.

²⁵ Ivag wouds māwan, vagan kid wuliyougwan katanok katanok mo bilabes o bivnāses sisiyas; awoum wouds wuliyougwan bilivis bivag bod babaw.

²⁶ Magat won wuliyougwan katanok bilivet mamayuy, bo bigeg wuliyougwan babaw. Magat won wuliyougwan katanok bilouvat yakawanan, babaw mo bimwāsaws.

²⁷⁻²⁸ Mamagina Kelis won, gamag yākids; teitan teitan mamagina wuliyougwan kweitan kweitan. Peinan Yowbad nikaleiwag tayakelesiys yākids dawotets kweitan kweitan. Takaweins livānen Yeisuw imugwas. Wankuyeim tasiyas palopit siwotet igeiguys Yowbad nanon. Wankuyeim takatimlakeins sinapun Yowbad. Wankuyeim tasiyas iwotets singay

tawtoun. Wankuyeim tasiyas ivvages vagan beibweins takatouns. Wankuyeim tasiyas ilabes sisiyas. Wankuyeim tasiyas magina takavaveis, ikaleiwags sisiyas wasigeis. Wankuyeim tasiyas tallivan kaeig kweitan kweitan wasigeis.

²⁹⁻³⁰Tabta babaw yakids takaweins livanen Yeisuw? Adok nag. Tabta babaw palopits, bitageiguys nanon Yowbad, babaw yakids? Adok nag. Tabta babaw yakids takatimlakeins sinapun Yowbad? Adok nag. Tabta babaw yakids dawotets tawtoun? Adok nag. Tabta babaw bitavages vagan beibweins takatouns? Adok nag. Tabta babaw yakids bitallivans kaeig kweitan kweitan wasigeis? Adok nag. Tabta babaw yakids takakins takativinis asilivan tasiyas? Adok nag.

³¹Kadiloka beivag sivinamiy vagein bwein Kululuwan Yowbad bisekeimiy. Tage ked singaya bwein bakatimlakeimiy.

Siwayoub

13 ¹Ked singaya bwein yagan siwayoub. Magat agulivan mamagina tassinap yey, o magina gum-libalab teitan yey; tage nag basiwayoub, agusinap gog makawan, agulivan mamagin kup iwawaysa mav.

²Magat balivnek nanon Yowbad, o magat bakakin youd babaw ven watinow waseg, o youd babaw libalab waseg, o magat balivan koy kweitan binoun bein palatan, basimounid, mo bivag mawan; tage nag basiwayoub, tasimav gog yey; basesuna mav.

³Magat bavgen gunwuliyoug beikous, o magat batam woug tatoneig bigabus kov, beikous, tage nag basiwayoub, nag kweitan maysan bakow wotet towen, nag.

⁴Kukin kal bisiwayoub, mo bikapatul, bikalin nuwan, nag bikaypom son navavag, nag bikaypom sinap, o nag bikaypom butun, nag.

⁵⁻⁶Kukin kal bisiwayoub, awoum kalbaleb ansinap, nag sivanan bikaleiwag, nag bikavikun, nag bininuway kalbaleb; o kukin biligen sinap kalbaleb nag bikalin nuwan, deisa bikalin nuwan sinap bwein waseg.

⁷Kukin kal bisiwayoub kadilok tut babaw bikapatul; tut babaw bisimounid o binamis son waseg; nag bikawegweis won, nag.

⁸Siwayoub nag beikous. Takinew siyas palopit nisesus; igaw siwotet biyakous. Takinew wudous tasiyas illivans kaeig kweitan kweitan wasigeis, igaw siwotet biyakous. Takinew sinap nises, igaw biyakous.

⁹⁻¹⁰Nagein gog kakit takakins, adsinaps nag bivakaein geiguy silmanin. Igaw avakaein sinap biton, mo biyakous adsinaps, to kakit.

¹¹Igaw wagwadig agulivan wadadan-wan, agusinap makaw, bulabol nanoug, peinan igaw gwad yey. Wankuyeim bo avakaein, sinapun gamagal mo alev.

¹²Nagein gog sinap avakaein nag bakakin, misinaka kakit-wan mamagina kululuwan akin; igaw wanakougwaw mo bakinbunik. Nagein

nag akakin bwein, igaw wanakougwaw bakakin bwein, mamagina Yowbad bweina ikikineig yey.

¹³Kweitoun sinap nisesus bwanabwein; kweitan simounid waseg Yowbad, kwayuwein namis, kwatounun siwayoub; youd tasiyas bisesus bisigagas. Tage sinap towen siwayoub singaya bwein, bo imug sinap babaw wasigeis.

Kaeig kweitan kweitan

14 ¹Kadiloka bukusiwayoubs singay. Kadilok beivag sivinamiy kululuwamiy wuliyougwan bwanabwein, o singay sivinamiy bukupalopisays Yowbad anilivan.

²Kukin gamag kweitan kaeig waseg bilivan, anilivan nag idibek gamag wasigeis; Yowbad gog iligen livan towen, peinan ikakin silawun. Gamag babaw nag biliganes. Kululuwan waseg ilivan. Gamag babaw nag bikakins silawun anilivan bo ikawumen-wan.

³Kukin bukugeiguy Yowbad anilivan, gamag mwasanin biliganes, bukwatimweisis tasiyas, vagan kid biwotets bwein, mo beitaw nuwes.

⁴Kukin gog kal kweitan kaeig waseg bilivan bo tonena ansinap bikatimweis; tage kukin kal bigeiguy Yowbad anilivan mo bikatimweisis tayakelesiy babaw.

⁵Sivinag babaw yakamiy kaeig kweitan kweitan wasigeis bukullivans, o singay sivinag bukupalopisays, peinan wotet towen singaya bwein. O magat teitan bilivan kweitan kaeig waseg bo bisunasun ninous gamag; o magat teitan bikativin anilivan towen mo bidumwal ninous, mo bikatimweisis tasiyas tayekelesiy.

⁶O sigweyas, nagein gog, magat bawekeimiy mo kweitan kaeig waseg balivan, balabeimiy-tan? Adok nag. Misinak bakamat sinapun Yowbad, o balivnek Yowbad nanon, o bakatimlakeimiy sinap bwein, mo balabeimiy yakamiy.

⁷O kukin gamag teitan makava bivkek alen, pikolel o git, mamagina biwawaya mav, nag beivag wous, gamag nag bikanuwels o nag bisilasals; nag.

⁸O magat teitan biyik bwagig, o nag biyik bwein, gamag nag bidumwal ninous, nag bikatunags naviy silmanin; nag.

⁹Mawan-vak yakoum, bukulivan kweitan kaeig waseg, gamag nag bidumwal ninous, nag bikakins aveiyag kulivan; mamagina kullivana mav.

¹⁰Wadaban pwepway kaeig singaya babaw, kweitan ven ages kweitan, kweitan ven ages kweitan. Silawun gamag tasiyas misikesa-yay ikakins.

¹¹Magat teitan gamag aygan kweitan, o yey nag bakakin aygan towen, igaw bakalivan amateiyun-wan, anilivan towen limwelem waseg yey, mapuna aygag yey limwelem waseg gamag towen.

¹² E, sivinamiy wuliyougwan kululuwamiy bwanabwein. Singaya kadilok beivag sivinamiy kululuwamiy wuliyougwan vagan bikatimweisis tayakelesiys babaw.

¹³ O towen kweitan kaeig waseg bilivan, kadiloka binitoug Yowbad waseg, vagan bikamtel anilivan silawun, mo bikamat babaw gamag wasigeis.

¹⁴ Magat kweitan kaeig waseg banitoug Yowbad waseg, misinaka kululuwag binitoug, tage nanoug nag.

¹⁵ Aveiyag bavag? Adok banitoug nanoug waseg, sona kululuwag. E, wous bakanuwel nanoug waseg, sona kululuwag.

¹⁶ Magat tobwag gamag nises wasigeis takayelesiys yakamiy, igaw bukuyakawen Yowbad, kululuwam yakoum waseg bukulivan kweitan kaeig waseg, mogo nag bikakin silawun amlivan, tobwag gamag towen, nag beitam bilana, “Mounid”; nag. Peinan nag bikakin.

¹⁷ Yakoum kuyakawn bwein, mogo towen nanon ta-bukwatimweis.

¹⁸⁻¹⁹ O, kalin nuwag Yowbad, peinan singaya allivan kweitan kaeig waseg, o yakamiy kukuyeims; tage sigwey tayakelesiys yakamiy sivinag agulivan misinaka kweinim, kamnat, nanoug waseg; bukuliganes, mo bakatimlakeimiy sinap bwein. Awoum kweitan kaeig waseg, agulivan singay babaw tawsan, peinan nag sinap kweitan bakatimlakeimiy, nag.

²⁰ O sigwey yakamiy, awoum beivag ninoumiy mawana gamagal. Kadiloka kusinaps bwein vagan gog bimatuw amisinap. Tage kadiloka bukutagouwaws sinap kalbaleb waseg.

²¹ Bukitab kaleiwag-nen nises mamagina:

“Igaw tasiyas ages kweitan bikawes agulivan bisekes gungamag. Ages tasiyas billivans wasigeis, tage nag biliganes.”

Yowbad ilivan mawan.

²² Magat kweitan kaeig bukutay, mamagina naman mulin Yowbad, silmanin tasiyas nag isimounids Yeisuw waseg; nag silmanin tasiyas tasimounids. Tage bukulivnek Yowbad nanon bukulabes tasiyas tasimounids Yeisuw waseg, tobwag gamag nag.

²³⁻²⁵ Igaw bukwatuyouns tayakelesiys yakamiy, kaeig kweitan kweitan wasigeis bukullivans, o teitan beiw, tobwag gamag o kavel nag isimounid Yowbad waseg, adok bilivan, bilana, “Kwabalaweins yakamiy”; tage beiw biligen kulivnakes Yowbad nanon babaw yakamiy, bo bigeg nanon peinan ansinap kalbaleb aveiyag nisowum wananon mo bikamat wananon gamag towen, mo bikalivatow bikantukov binitoug Yowbad waseg vagan bileb, peinan ansinap kalbaleb; e, bilivan, bilana, “Mounid Yowbad nises wasigeis yakamiy.”

²⁶ Livan towen nalivan kuliganes. Igaw kwatuyouns yakamiy, tapwaloul silmanin, teitan anawous bikanuwel, teitan bikatimlakay sinap, sinap kawum nikamat teitan waseg mo bisek, o teitan bilivan kaeig kweitan

waseg, o teitan bikativin livan towen. Youd babaw kuvages vāgan bikatimweis amisinap yakamiy tayakelesiys babaw yakamiy.

Youd babaw didumwal

²⁷⁻²⁸Tasiyas tallivan kaeig kweitan kweitan wasigeis, deisa asteiy o asteitoun. Awoum bibabaw. Teitan bimug, teitan bikuyeim. Kadilok teitan bikativin asilivan. Kukin takativinin livan nag, awoum kweitan kaeig waseg billivans, tapwāloul waseg; misinaka wananon billivan, asteiy son Yowbad biliganes.

²⁹Tasiyas talivnakeins Yowbad anilivan, asteiy o asteitoun bilivans, tage tababaws yakamiy kwatukins asilivan, aw-sinap bwein, aw-sinap makaw.

³⁰⁻³¹Igaw teitan bisin tapwāloul waseg, biligen-wan, Yowbad mo bikatimlakay ansinap kweivaw; kadiloka bitamanaw bikamat ansinap towen; tageiguy tonen bikapay. Kadiloka babaw yakamiy bukulivnakes Yowbad nanon, sivaṭan teitan bilivnek, ikous, sivaṭan mo teitan bilivnek, vāgan bukulabes gamag babaw, mo bikakins sinap babaw, vāgan bitawtouns.

³²⁻³³Talivnakeins Yowbad anilivan ikaleiwags wasigeis kululuwes tatineis, peinan Yowbad nag bikaleiwag makaw; tage bwein-wan.

³⁴Kadiloka vinay ven babaw mitapwāloul waseg bikapays; awoum bilivans, awoum bikatimlakes tawaw. Biliganes-wan. Moses nakaleiwag māwan; o tayakelesiys babaw dakaleiwags māwan.

³⁵Magat vin nātan sivanan kweitan sinap bikakin, kadiloka bikatugwan waseg namwan wasibunatum tatineis. Magat vinay bilivans tapwāloul waseg, bo beivag admwasins.

³⁶Awoum kwaypamwes sinap yakamiy, mamagina Yowbad anilivan nakabsilamaw o nakabiyokous wasigeis yakamiy, awoum. Awoum kudokes ven mwasanin gimgilis tatagouwaws tasiyas.

³⁷⁻³⁸Kal yak kudok palopit yakoum? O kal yak kudok Yowbad Kululuwan wuliyougwan nises waseg yakoum? Kadiloka kukwakins kaleiwag towen nalel, milet towen waseg, daGuyaws nakaleiwag tatonen. Kukin kal yak nag bukusimounid, bo bukusesuna tatagouwaw yakoum.

³⁹O sigweyas, livan towen kuninuways, kuneves amisinap vāgan gog bukugeiguys. O tasiyas tallivans kaeig kweitan kweitan wasigeis, awoum kusilbwades.

⁴⁰Youda babaw didumwal-wan kuvages tapwāloul waseg, kadilokena beibwein amisinap yakamiy.

Yeisuw ikanig mo ikit vayuwein

15 ¹⁻²O sigweyas, kukwakins livan towen bwanabwein kweiboug nasekeimiy, nukusimounids waseg, tut towen kuyousis waseg,

livānen Yeisuw, nikatinabweids yākids. Mitawtoun waseg bukuyousis livan townen nasekeimiy, moundid mo bikatinabweimiy; kukin gog nag bukuyousis, adok nag bikatinabweimiy.

³Yeisuw Kelis bo isekeig gunawotet vāgan bakokew livānen townen, nikanig peinads, adsinaps kalbaleb silmānin, māwan livānen nises Bukitab waseg. Silawun livānen Kelis townen, bo nakow nawey nasekeimiy yakamiy.

⁴E, livan townen, Mesay Kelis ikanig peinads, itakus watakunumwan waseg, yam kweitoun mo ikit vayuwein, māwana Bukitab nilivnek.

⁵Ikit; Pita mo ikin; wankuyeim navamul sinawatan teiy mo ikines.

⁶Wankuyeim simayas lakatunim mo ikines; tasiyas sona mwamoves igawa nisesus, asteiyuy nikanigs.

⁷Wankuyeim Yemes mo ikin; wankuyeim tasiyas takaweins livānen Yeisuw tababaws-wan.

⁸⁻⁹Tut kadiveiyov wankuyeim, yey mo akin daGuyaws townen. O yey magina tobwag gamag yey, agusinap kalbaleb. Bo igak! Bo awaweiy Yowbad nagamag tayakelesiys babaw! Mapuna singay ābus takaweins livānen Yeisuw wasigeis. Mamagina takawein livānen Yeisuw, tobwag gamag yey.

¹⁰O kalin nuwag Yowbad, bo isiwyoubug, isekeig agusinap kweivaw, to nises nisigeg waseg yey. O nag isiwyoubug mav, gunawotet waseg bo alisawes tasiyasa babaw. O nag guntawtoun tatoneig; misinaka Yowbad ikalin nuwan waseg yey, soug Yowbad isiwyoubug, ilabeig mo awotet bwein.

¹¹O yey awwotet, tasiyas iwwotets. Awoum taninuways kalisiy siwotet tawtoun. Deisina bo nakalivan, bo kuliganes livānen Yeisuw.

Mwasanin ilansa, “Nag kal beikit vayuwein”

¹²Amalivan mamagina Yeisuw Kelis ikanig mo ikit vayuwein; tage mwasanin yakamiy kulivans kulansa, “Nag kal bikanig mo beikit vayuwein.” Aveiyag wawun kulivans māwan?

¹³Magat nag teitan beikit vayuwein, mapuna Kelis nag beikit.

¹⁴Magat nag beikit Kelis, adok bitageiguys mav, o bitasimounidsa mav.

¹⁵Peinan talivans kid, “Yowbad ivag Kelis mo ikit vayuwein”; o kukin nag teitan beikit vayuwein, nag ikit Kelis, adok tayyaweids yākids, Yowbad livānen waseg.

¹⁶Magat takanigs nag beikits, Kelis igaw wakanig nises.

¹⁷Magat Kelis townen igaw wakanig nises, adok bo tasimounidsa mav; adsinaps kalbaleb igawa nises.

¹⁸O magat Kelis igaw wakanig nises, adok nag bimwasaws tasiyas nisimounids townen waseg mo ikankanigs; adok bo ikous gimgilitouns tasiyas.

¹⁹Kelis bo ilabeids ven watinow waseg, tage yakamiy kulivans kulansa, “Igwaw bitakanigs Kelis nag bilabeids.” Kukin bitaninuways ma_wan, nag bitamwa_ssaws tut towen waseg. Gamag mwasanin bimwa_ssaws, yakids nag.

²⁰Tut gog towen Kelis bo ikit kanig waseg. Bo imug, takanigs babaw wankuyeim.

²¹Peinan gamag teitan ivag ansinap kalbaleb, mo imug kanig waseg; o peinan tayuwein ivag ansinap bwein mo imgwayes tasiyas takanigs, peinan ikit vayuwein.

²²O peinan gamag babaw yakids takikunis Adam, kanig talivatus; sods Kelis mo bitaba_nes damwamovs.

²³Tatanok tatanok yakids adatuts tatoneids bo taba_nes damwamovs. Kelis bo imug, igaw wanakougwaw beiyum beim ven watinow, mo bitakuyeims angamag yakids, bitakits vayuwein.

²⁴Igwaw tutan nakabiyokous ven watinow Yeisuw Kelis bo bigulekwes kululuwan tasiyas sikaleiwag kalbaleb, bitakayway wasigeis tasiyas. Ikous, Yeisuw nakaleiwag tawtoun mo bisek Taman Yowbad.

²⁵Peinan Kelis bo bikaleiwag, bitawtoun ee... igaw mo bikaleiwag wasigeis tasiyas nikameiliws waseg, mamagina Kelis biva_nis tasiyas.

²⁶E, kanig-vak mo bivan, bitawtoun waseg, mo beikous kanig sinapun.

²⁷E, Yowbad ivag Kelis mamagina takaleiwag youda babaw wasigeis. Bukitab nilivnek ma_wan. Tage Kelis nag bikaluweg Yowbad, peinan Yowbad bo bisek nakaleiwag tonen.

²⁸E, Yowbad bisek Natun nakaleiwag youda babaw wasigeis; Natun mo beitam Taman nakaleiwag waseg, va_ngan kid Yowbad anmwa_net bisesuna takaleiwag tonen.

²⁹Kweitan youd nises. Gamag mwasanin ibapta_yses takanigs pines. Kukin takanigs nag beikits vayuwein, aveiyag wawun ibapta_yses pines? Silawun nag.

³⁰O kukin nag bitakits vayuwein, aveiyag wawun naka_tam tuta babaw abem kalbaleb waseg? Adok bweina bakapiyev mawotet towen.

³¹Tawaw! Yam babaw kakita bakanig; tabudaboda Tamad! Adibakeimiy ma_wan peinan ikalin nuwag yakamiy, nukumlavags daGuyaws Yeisuw Kelis angamag yakamiy.

³²⁻³³Kukin nag ba_kit vayuwein, aveiyag wawun nakavvatay sigwey bulawud babaw, ven Epesos waseg. Wotet towen ta-ivag anagin ven watinow. Adok bitaligen kweitan livan mamagina, “Bo bitakams, bitamoums peinan nubweig mo bitakanigs.” Awoum! Awoum kuliganes livan towen. Magat gamag mwasanin simiyas asisinap kalbaleb, igaw mo bukwaylasis asisinap to kalbaleb.

³⁴Kadiloka kusinaps bwein, va_ngan kid biyakous amisinap kalbaleb. Adok mwasanin yakamiy nag kukwakins Yowbad. Alivan ma_wan va_ngan beivag amimwasin. Kadiloka kusinaps bwein.

Wouds kweivaw

³⁵ Mwasanin gog bikatugwans, bilansa, “Tasiyas takanigs amawan beikits? Avei-woun waseg bisaps?”

³⁶⁻³⁷ Bo beibol nanoum bukulivan mawan. Kuninuways. Bukusop youpeis wabag, youpeis towen bikanig, namwamov vayuwein mo biban, igaw mo bimlavag kay. Nag kusop kay avakaein; misinaka youpeis kuspousop, o veitun mayis o aveiyag-vak bukusop.

³⁸ Kweitan youpeis-nen kaytan kay, kweitan youpeis-nen kaytan kay. Yowbad ibubun mawana nanon towen. Mamagina askakin ivag wunuweina-wan.

³⁹ O man mawan, ivag wous kweitan kweitan. Buluk woun tonen kweitan magin, man iyoyow woun tonen kweitan magin, in woun tonen kweitan magin; gamag yakids wouds toneids kweitan magin.

⁴⁰ O min-libalab wous kweitan, o gamag yakids wadaban pwepway wouds kweitan. Yakawanes min-libalab kweitan; yakids yakawanads kweitan.

⁴¹ Yakawanan kalas kweitan, peinan mititeilin avakaein. Yakawanan tibukon kweitan. Wutun yakawanes kweitan kweitan, peinan kweitan mititeilin avakaein, kweitan mititeilin kakit.

⁴² Mawan-wan bo bitakits, dakabkanig mo bitalisawes. Mamagina bisapwes wouds bo beipwas, bitakits wanakougwaw wouds nag beipwas.

⁴³ Bo bisapwes wouds admwasins waseg, wouds wanakougwaw bitakits yakawanads waseg. Wouds iguyagweys bisapwes, tage igaw wanakougwaw wouds tawtoun waseg mo bitakits vayuwein.

⁴⁴ Bo bisapwes wouds mamagina man babaw wous ven towen, tage wouds wanakougwaw bitakits mamagina min-libalab yakids. Peinan woun nises watinow, mogo woun nises wanakaew.

⁴⁵ Livanen nises Bukitab waseg, mamagina,

“Gamag wanamug yagan Adam nikow mwamovan kaleivin waseg.”
Tage gamag wankuyeim yagan Kelis, kululuwan imov, iyamoves gamag.

⁴⁶ Ta-imug kululuwads. Wouds wanamug; kululuwads wankuyeim.

⁴⁷ Wanamug Yowbadibun gamag ven watinow, pwepway waseg.
Gamag wankuyeim naven libalab.

⁴⁸ Kalisiy mawan Adam wous mamagina pwepway; o kalisiy siven libalab mamagina Kelis, wous kweitan.

⁴⁹ Igaw ven watinow wouds mamagina pwepway; igaw libalab beivag wouds mawan magina Kelis.

⁵⁰ O sigwey, agulivan mawan, vagan bukukwakins kaleivids nag beisiw Yowbad nakabkaleiwag; nag. Wouds wadaban pwepway bo biyakous, nag bisesuna bisigeg; nag beisiw Yowbad nakabkaleiwag; nag.

⁵¹⁻⁵² Sinap kweiboug ikawum-wan, nagein bakatimlakeimiy. Babaw yakids nag bitakanigs, tage wouds nuwanawa bikatilow mawana libalab

woun-nen. Igaw biyik bwagig, mo bikatilow wouds, magat yakids igaw tamwamovs yakids; tage tasiyas takanigs bo beikits.

⁵³Tut towen wouds imtamats, bipsapwas; ikadiloka bikatilow wouds kweivaw, nag bitakanigs, tasesusa bitasigagas.

⁵⁴⁻⁵⁵Igaw Yowbad bivag mawan, mo bikamat livanen kweiboug nilivnek mamagina:

“Bo bitakayway kanig waseg.

Kanig nag bitakayway; nag.

Kanig bo biyakous.

Kanig mamyuyan bo beikous.”

⁵⁶Takakins sinap kalbaleb peinan Moses nakaleiwag nises; o peinan adsinaps kalbaleb, kanig mamyuyan mo talivatus.

⁵⁷O kalin nuwads Yowbad, peinan daGuyaws Yeisuw Kelis nilabeids mo tatakayways sinap kalbaleb waseg, o kanig waseg.

⁵⁸Sigwey bwanabwein yakamiy, bweina kutoukums, kutawtouns, tut babaw kuwteles bwein daGuyaws nawotet. Peinan kukwakinsa bitawotet daGuyaws waseg, nag bitayamkwen wotet anagin.

Muloul

16 ¹Kweitan youd, muloul Yowbad nagamag silmanin. Mawan bo akaleiwag min-Galetiy tasiyas tayakelesiys wasigeis, kadiloka kuvages mawan.

²Wik nakabsilamaw, yam tapwaloul waseg, kumulouls. Babaw yakamiy kusemos mimuloul; mawana wotet anagin bukuban, mo bukumuloul mawan. Igaw mo baw, mimuloul nanawan.

³Igaw baw, yakamiy mo bukwareiwags kalisiy bikawes mimuloul binawes Yelusalem; yey bo balel let silmanin min-Yelusalem, basek gamags tasiyas, vagan bikawes son mimuloul, binawes Yelusalem.

⁴Kukin sivinamiy, sigwey tasiyas bo bakan Yelusalem.

⁵⁻⁶Igaw ban Masidoni, wankuyeim mo bawekeimiy, peinan banekes min-Masidoni, mo bawekeimiy wankuyeim. Yey amibwabwal yey basesun-wan. Adok biyakous bulbweilim mo bukutaneigs ampalawen banoy.

⁷Nag sivinag baw mo basinanam balisaweimiy, nag; kadiloka tut kalamwey biveiyov wasigeis yakamiy bases; magat daGuyaws nanon mawan waseg yey.

⁸⁻⁹Basesun Epesos, ee... sagal yagan Pentikos beikous, mo baw. Peinan ven towen Epesos waseg kadilokeig wotet avakaein bawtel, o gamag babaw sivines kid bisilbwades gunawotet.

¹⁰Igaw Timotiy beiw, kukines aban beibwein wasigeis yakamiy, peinan iwtel daGuyaws nawotet, mawana yey nawtel.

¹¹Awoum teitan gamag bikasigum mtowen Timotiy. Igaw bilisaweimiy, bimekeig, kadiloka kutanes bwein, peinan akaymates towen siney tayakelesiys mwasanin.

¹²Livānen veiyouds townen Apolos nukulivans, bo asimkin townen binoun biwekeimiy siney tasiyas tayakelesiys mwasanin. Asimkakina nag; peinan idoki bikayamat kweitan tut bwein, mo beiw.

¹³⁻¹⁴Kadiloka kuvnāses amisinap vāgan tut babaw bukusimounids Yowbad waseg. Kukwapwapouts, kutawtouns. Youda babaw kuvāges siwayoub waseg.

¹⁵⁻¹⁶O sigwey, sivinag bukuvnāses bwein Sitepānas sen nagamags. Tasiyas wanamugwana ven Akay waseg isimounids Yeisuw waseg; gamag babaw sisimounid ikuyeim. O tasiyas Sitepānas sen nagamag bwein imtakavates Yowbad angamags. Kadiloka kwanawes ages Sitepānas, sen gamag kalisiy biwotets siwotet māwana townen.

¹⁷⁻¹⁸Bo isaps tasiyas Sitepānas, Poltunet, Akeikos, mapuna ikalin nuwag seikwan, peinan yakamiy kadiveiyov nag kadilok bukulabeigs, o tasiyas bo ilabeigs bwein, mo itaw nuwag, o adok yakamiy māwan. Kadiloka bitavnāses gamag tasiyas beibwein.

¹⁹Tasiyas tayakelesiys ven avakaein Esiy waseg asilivan siwayoub wasigeis yakamiy. Tasiyas Akwil son nakwav Pilisik singay ikalin nuwes yakamiy, daGuyaws silmanin; o tasiyas babaw nitapwālouls wasibunatum asilivan māwan.

²⁰Yowbad nagamag babaw asilivan siwayoub wasigeis yakamiy. Kadiloka kuyaseles nimamiy simiyas wasigeis, kumulouls beibwein.

²¹Gunamuloul townen nalel namag toneig waseg niwekeimiy. Yagag kukines Pawl.

²²Kukin teitan bipiyev daGuyaws, kupiyaves gamag townen, kwayabes bein watoulān. Nuwanaw bo beim daGuyaws tonen.

²³DaGuyaws Yeisuw bisiwyoubumiy.

²⁴Yey asiwyoubumiy babaw yakamiy, Yeisuw Kelis peinan.

Yey Pawl.